

Ons sien die heerlijkheid van God in sy skepping.

As jy die kus besoek sien jy die mooiste sonsondergange. As die son in die see verdwyn raak dit stil op die strand. Die meeste mense hou op praat. Alle oë is op die kleurvolle horison. Die stille heerlijkheid van God se sonsondergang werk met ons emosies en bring verstomde verwondering in ons harte. As die son in die see verdwyn het, gaan elkeen weer voort met dit waarmee hulle besig was, maar met hierdie vers in jou hart: **"Here, ons Here, hoe wonderbaar is u Naam oor die hele aarde!" (Ps. 8: 1 en9)**

God se heerlijkheid skyn in die hemel, maar ook op die aarde. Ons was gister sprakeloos toe ons die wêreld erfenisgebied, Baviaanskloof, besoek het. Die sensitiewe balans van die skoonheid van berg, rivier en unieke plantegroei, waarvan talle spesies net hier voorkom, vertoon die mag van die hemelse Kunstenaar. Die grootheid van een van die mooiste tuine deur die ewige Tuinier self uitgelê, demonstreer die onbegryplike grootheid van God self. Dit maak jou dankbaar. Dit inspireer danksegging.

God se Naam word nie net in ons harte groot gemaak nie; sy Naam is wonderbaar oor die hele aarde. Baie klein dingetjies, op die oog af onbelangrike detail, openbaar die grootheid van die Here. Elke blommetjie wat oopgaan, elke voëltjie wat sing, elke nuwe lewe op ons planeet, verkondig die majesteit van God. Elke betekenisvolle verhouding, elke verliefde paartjie en elke ma wat noukeurig sorg vir haar baba, help ons verstaan hoe heerlijk en wonderlik ons Here is.

Dawid begin en eindig Psalm 8 met dieselfde woorde - woorde van lof aan God:
(Ps 8:1 en 9) Here, ons Here, hoe wonderbaar is u Naam oor die hele aarde

God se Naam staan vir sy persoon, sy wese, sy karakter - en dit is alles majestueus en wonderbaar. "Wonderbaar". In Hebreeus vertel hierdie woord van 'n onvergelykbare, almagtige God.

Ons glo in en aanbid die enigste, ware, lewende God, wat Gees is, wat persoonlik, oneindig en ewig is. Hy is teenwoordig op elke plek as die almagtige oorsprong en soewereine Heer van alles. Hy kan nooit genoeg gedank word nie. Hy is die allerheiligste en die mees vrye. Hy is volmaak in wysheid, regverdigheid, waarheid en liefde. Vir ons is Hy die bron van alle ontferming en genade. Aan Hom hou ons vas. Ons aanbid en gehoorsaam Hom. Aan God behoort al die heerlijkheid, tot in ewigheid. (Art 1 van die 24 Artikels van die Geloof).

Ons hoor hierdie boodskap op elke bladsy van die hele Bybel.

(Eks 15:11) Wie van die gode is soos U, Here? Wie is soos U, so hoog geëer en heilig? In lofsange word U vereër, Bewerker van wonderdade.

(1 Sam 2:2) Daar is geen heilige soos die Here nie, buiten U is daar nie een nie, daar is geen rots soos ons God nie.

(Jer 10:6) Waar is iemand soos U, Here? U is groot, die mag van u Naam is groot.

God is majestueus. Hy is wonderbaar in krag, in heerlijkheid, in grootheid, in heerlijkheid, in werke en in heiligheid. Niemand kan met Hom vergelyk word nie. Daar is geen ander god soos die HERE, die Almagtige nie.

Vir koning Dawid is die majesteit van God veral sigbaar in sy groot en wonderlike skepping. Dawid kyk na die son, maan en sterre, hy kyk na die visse, voëls en diere en hy kyk na die mens. Hy sien alles wat God gemaak het en sê:

(Ps 8:1,9) Here, ons Here, hoe wonderbaar is u Naam oor die hele aarde.